

李文襄公奏疏

李文襄公奏疏目錄

題稿卷之七

督師

處屬杜溪周公源口楊梅灘捷功

彙報勦撫江西廣信等處捷功

招撫偽揚烈將軍全旅歸誠

再請蠲免被兵地方錢糧

勦撫鄰省巨寇陳山屯踞椒巖洞

請卹殉難副將蘓木代把總左朝極

加秩謝恩

請調回江南援浙官兵

李文襄公奏疏卷七

招撫鄰省渠寇歸誠

三請蠲免被兵地方錢糧

李文襄公奏疏卷七

男 鍾麟編次

處屬柱溪周公源口楊梅灘捷功疏

總督浙江等處地方軍務兼理糧餉兵部右侍郎兼都察院右副都御史臣李之芳謹密

題爲各路勦撫兼施處逆老巢盡掃謹報捷功仰祈

睿鑒事據署處協副將事提標叅將王英塘報到臣該臣看得柱溪周公源口及黃皮山楊梅灘等處地臨江閩并通衢處屬縣內皆萬山險峻人跡罕到向係巨寇魏福賢等巢穴順治年間屯踞此地漢爲心腹大

患茲閩逆林惟仁等原係僞驍騎將軍馬九玉營內
分出屯踞處屬之賊首自石塘敗潰之後統率賊衆
盤踞此地恃險負固此勦彼遁流毒於遂昌松陽龍
泉等縣若非官兵鼓勇深入各路會師則根株終難
盡絕蔓延日久終成大患臣隨密飭署處協副將事
提標叅將王英等臣標守備李和等并調發援浙江
南京口等營各路官兵訂期會合勦撫兼施富有僞
叅將朱伯珍等帶領僞遊擊都守千把大夥僞兵首
先投順而賊首林惟仁等尙擁衆於周公源口及黃
皮山楊梅灘等處抗不歸命臣復密飭該將王英等

并各路官兵毋以嚴寒雨雪山谷崎嶇有憚勞苦務
宜速爲勦撫早定地方庶可一勞永逸在各官兵皆
能奮力踰險四路深入直搗賊巢斬獲甚多逆賊勢
不能支僞叅將王國昇同僞遊擊千總等員跪路乞
降林惟仁同僞副叅遊擊都司守備千把大夥僞兵
奔赴守備李和等營盤歸順當據解報前來除一面
分別入伍歸農安插外自此最險老巢掃蕩無遺處
屬地方勦撫已盡是役也時值隆冬雨雪交加官兵
越險深入備極勞苦此番奮勇用命功尤難泯經臣
量行給賞鼓勵所有勦撫復捷賊黨淨盡情形相應

題報至在事有功人員遵例造冊送部臣謹密

題伏乞

皇上睿鑒施行

康熙十六年二月初七日題奉

古覽卿奏遣發官兵於處屬之周公源口等處勦撫兼施
賊首林惟仁率領偽副叅遊守等衆奔赴投誠賊巢掃
蕩無遺處屬地方寧靜具見調度有方將士勤勞可嘉
在事有功人員着議敘具奏該部知道

彙報勦撫江西廣信等處捷功疏

總督浙江等處地方軍務兼理糧餉兵部右侍郎兼
都察院右副都御史臣李之芳謹密

題爲彙報勦寇獲捷情形并安撫鄰省縣城事據浙江
提標遊擊郭守金紹協都司僉書朱士俊臣標守備
段斌江南提標守備路雲昇等塘報各到臣該臣看
得江西饒廣一帶奉

旨會勦除經遣發官兵於白沙關德興等處勦賊獲捷具
疏

題報外惟是江西官兵尚未前至而饒廣二府所屬鉛

山與安弋陽貴溪等處數百里之間盡係賊黨分佈
與江西省城阻隔不通臣遵會勦之

旨不敢歧視當卽飭行領兵各官相機勦撫安撫地方隨
據提標遊擊郭守金紹協都司僉書朱士俊等報稱
於上饒縣鄒家坊姜歷村地方連破賊營三座陣斬
僞副將守備等員殺賊甚衆并將陣獲僞守備楊文
及僞卒人等解臣軍前發落臣惟饒廣所屬之地迫
脅者衆誅之不可勝誅臣隨面加開諭令其齎示前
往宣布

朝廷好生德意凡陷賊官民及早歸順去後所有餘孽出

沒飭行防守各官不時撲勦又據臣標守備段斌江
南提標守備路雲升等報稱於廣信之焦石渡等處
陣斬偽參將殺賊甚衆得獲器械等項又據該守備
等報稱乘勝進至新嶺地方連破三寨陣斬偽副參
遊都守等員燒毀巢穴殺賊甚衆恢復鉛山縣城得
獲器械等項又據該守備等報稱前至興安弋陽貴
溪等縣勦除餘孽自楊文等齎示放歸一路曉諭各
偽官兵盡皆剃髮向化隨安撫過興安弋陽貴溪等
縣所至百姓人等歡欣歸命又據該守備等報稱於
橫溪港東紫溪等處陣斬偽參將遊擊千總把總等

員殺賊甚衆焚燬老巢連戰獲捷得獲器械等項招
撫僞官兵各具塘報前來從此江西省城道路可通
除卽一面移咨江西督臣撫臣催令地方官員馳赴
新復府縣任事外至各官兵奮勇用命勦撫兼施功
勤難泯現經臣一面量行給賞鼓勵所有勦殺獲捷
并安撫各縣情形相應

題報至在事有功人員遵例造冊送部臣謹密

題伏乞

皇上睿鑒施行

康熙十六年二月初七日題奉

旨覽卿奏遣發官兵於江西廣信等處地方相機勦撫屢
次擊敗賊衆斬殺甚多陣斬僞副將等恢復鉛山縣城
又興安弋陽貴溪等縣百姓等歡欣歸命隔省遣官兵
勦賊底定地方具見調度有方將士奮勇可嘉在事有
功人員着議敘具奏該部知道

招撫偽揚烈將軍全旅歸誠疏

總督浙江等處地方軍務兼理糧餉兵部右侍郎兼
都察院右副都御史臣李之芳謹密

題爲招撫偽將軍轄下官兵全旅歸誠臣謹具

題仰祈

睿鑒事竊照江西岐界餘孽未平臣

題請會勦奉

旨依議速行臣卽遣發官兵密示機宜勦撫並用所有屢
次獲捷并恢復地方情形業經

題報在案惟有偽揚烈將軍程鳳擁衆數萬偽設內五

管外五營及城守水師衝鋒遊兵奇兵親隨戎旗等
共二十餘管屯踞德興等處拒守險隘臣於康熙十
五年十一月初旬因江西官兵尚未前至總屬

朝廷封疆不敢岐視當經頒發諭劄令臣標叅將蔣懋勛
相機勦撫隨於十一月二十一日據該叅將塘報偽
將軍程鳳接奉招撫諭示已願輸誠并據程鳳呈覆
在案後因逆首馬鵬侵犯白沙關外臣卽密飭瑞安
管副將武榮等殺賊敗遁於十一月二十九日直抵
德興連破一十三寨活擒馬鵬逼臨偽將軍程鳳巢
穴此時程鳳又差偽官李雲馬奇持書到該副將等

管詞稱已蒙招撫效順不必進兵等情據該副將等轉報前來臣隨密飭廣信關常等處防勦將領按兵駐境相機招撫并確探情形不時飛報以憑調度在案於康熙十六年正月二十四日承准奉命大將軍和碩康親王諭開據揚烈將軍程鳳啓稱敬奉本親王諭到仰擬差員齎遞遵依奈關隘阻隔又奉揚威大將軍和碩簡親王總督江西董部院平寇將軍石和碩額駙總督江南阿部院諭令併總督浙江李部院手札各招撫前來今奉諭令遠頒恩恤至再其剗印若卽繳換恐一旦無以約束士心仰祈鑒原先將

家口安插或於德興或於廣信俾有所依并祈知照
江西江南浙江部院便風馳赴面繳劄印等語照得
楊烈將軍程鳳旣願赴本親王軍前歸誠所有家口
該督於文到之日或於德興或於廣信着議安插務
期得所以便該將軍馳赴本親王軍前親繳印劄可
也該督仍移知江西總督爲此特諭到臣承此臣卽
移會江西督臣并行僞將軍程鳳令其開報官兵家
口實數以便安插遴遣外委都司金滿斗等齎文前
往招諭去後據金滿斗等回稱奉命於二月初五日
到揚烈將軍處投文彼稱江南江西俱有文書前來

招撫願來浙江投誠等語正在酌行間不意程鳳於二月初十日身故理合稟報等情臣查程鳳自上年十一月內卽據有願來歸誠之稟到臣又具啓大將軍康親王請就安插已經三月有餘尚未撤兵開剌今據報病故恐各僞官兵衆心不一復生變故臣一面頒發各僞總兵諭帖以程鳳之矢忠歸誠皆由將士同心效順今主帥雖亡而諸營各有統領若能率先向化仰體

朝廷懷遠之仁自當加意撫綏咸俾得所倘欲於江西江南就撫者總屬一體聽從其便但宜早爲決策以遂

前功勿因軍中無主懷疑觀望又遣衝協都司僉書夏必成外委都司金滿斗等齋諭前往相機招撫一面調遣江南提標遊擊任九玉帶領官兵前赴慶信會同督標守備段斌等各整兵馬示以形勢又照會饒南總兵官高登科令其會合浙省官兵并同該地方官協力撫戢俱各分行去後隨據都司僉書夏必成等報稱卑職等奉令於二月二十六日至德興十五都關上揆有偽將軍之妻王玉貞掌管偽揚烈將軍印務差偽守備李虎等在關把守據稱我家有內五營外五營還有六師管城守營及衝鋒奇兵遊兵

親隨戎旗等共二十餘管現在爲程將軍修薦等語
卑職等將諭帖令其分發各僞員併要進關親見招
撫至三月初三日掌僞將軍印務王玉貞令僞總兵
譚勝差僞叅將李壽先等前來口稱願來浙江歸誠
力辭不必進見三月初八日掌僞將軍印務王玉貞
又差僞總兵譚勝楊彪親來面會口稱蒙浙江部院
招撫洪恩咸願傾心向化但程將軍甫於二月初十
日身故各管現在修薦容俟事畢卽來歸誠今掌印
王將軍差員王子管曹勝前赴浙江部院軍前面陳
納款譚勝等均各備有呈稟現在等情卑職等卽同

王子管等於三月十一日赴衛呈覆前來臣閱各偽
總兵葉廷桂等稟稱程鳳甫經身故容俟修薦事畢
卽來歸誠並無繳送印劄的期隨經剴切發諭各偽
總兵等既稱向化卽當剋期來歸毋得遲延逾限并
傳僞員王子管等而加撫慰多方開導限定日期齋
文回覆去後於三月二十二日據掌僞揚烈將軍印
務王玉貞呈稱奉本部院招撫卽傳諭各營實在官
兵六萬七千三十二員名一體遵諭歸順懇乞本部
院差員赴營以便卽繳印劄等情又於三月二十五
日據僞總兵葉廷桂等呈稱復奉本部院頒諭諄切

不敢逾限遵卽率領官兵并各家口於三月二十日
已至廣信姜歷村地方候示安插等情臣據報官兵
衆多自德興廣信玉山常山以至衢州道路遙遠經
過地方恐致騷擾且沿途支應口糧浩繁浙省一時
未能盡數安插勢難令其枵腹必致多費錢糧隨令
外委都司金滿斗等前往傳諭旣經效順應聽隨便
安插如有土著官兵不願遠離故土者卽便分發回
籍有願赴江西投誠者總屬一體聽從所便又頒諭
投誠各總兵約束兵丁嚴禁騷擾并分飭調防廣信
援浙江南提標前營遊擊任九玉督標守備段斌嘉

興營守備薛受益廣信府知府高夢說等調防江西
玉山縣紹協都司朱士俊委署玉山縣知縣張偉烈
調防常山縣督標叅將蔣懋助常山縣知縣袁鏞等
令其會同料理逐程接護併隨便安插所過地方務
令秋毫無擾并令臣衙門筆帖式他海巴達外委都
司包秉彝段澄陳嘉績協同催趲料理均各分行去
後又據饒南總兵官高登科塘報三月十八日德興
勦賊二十一等日偽總兵譚勝等投誠隨經臣照會
該鎮據掌偽揚烈將軍印務王玉貞并偽總兵葉廷
桂等呈報於三月二十日率領官兵已至廣信姜歷

村地方該鎮卽安堵餘衆以靖地方等因今據寧僞
揚烈將軍印務王玉貞率領僞官兵於四月初二日
到玉山縣初六日到常山縣因投誠官兵衆多接護
各將領并府縣各官遵臣飭行隨路分發安插至四
月十三日赴臣軍前據王玉貞呈稱康熙十五年十
一月內蒙本部院頒諭招撫程鳳矢心效順業已備
悉陳情緣抱沉疴未及起行至康熙十六年二月初
十日病故荷蒙本部院差都司金滿斗等開誠曉諭
三軍感激莫不踴躍傾誠隨差王子管等具報在案
復於三月十九日奉本部院檄催限期嚴切玉貞遵

卽率領官兵於次日黎明就道全師歸誠除康熙十
五年十一月內奉本部院招撫程鳳回報投誠轄下
浮梁祁門婺源東流建德都昌鄱陽樂平餘干安仁
萬年等處陸續解散回籍官兵八萬三千有奇今臨
行所有官兵六萬七千三十二員名奉本部院推誠
招諭令將逆藩靖南王原給饒州偽總兵官程鳳勅
文一道偽揚烈將軍程鳳勅文一道偽將軍銀印一
顆偽副將叅將銅關防六顆各總兵副叅等官偽劄
付三百八十三張偽王令旗牌二面偽令箭五枝偽
大叢一面坐叢二面偽高照一面理令呈繳等情又

據我誠總兵葉廷桂楊彪孫震等呈稱程鳳舊蒙康親王令諭暨本部院撫示已經傾心效順回報在案不幸身故未克報效以軍中不可無人統束咸推程妻王氏玉貞掌僞將軍印務嗣奉本部院差員往返頒諭招撫王玉貞卽傳集通曉翁然向化樂平高總兵兵臨德界王玉貞以議定歸誠未敢交鋒比卽檄令各鎮營進剏花林雙溪等處聽候示下於三月十九日奉檄限期隨卽率衆就道雖三軍踴躍來歸皆由本部院推赤之至有以悅服人心而玉貞洞知大勢向化獨殷懇

題優敘等情前來臣逐一面諭我

皇上浩蕩洪恩好生德意各皆犒給銀牌花紅袍帽牛酒
無不踴躍惟悴誓死無二至能齋臣招撫諭示徃返
宣布克著勤勞者係臣標外委都司金滿斗張文福
張龍胡茂盛曹大偉王家榮馬金龍孫文豹劉永捷
外委守備宋邦傑隨征部劄衛千總下佳衛協都司
僉書夏必成外委把總徐龍西安縣嚴剝司巡檢胡
應龍投誠効用叅將張見可也其能奉臣指示機宜
整率官兵駐師境上以撫兼施并沿途防護約束者
係臣標叅將蔣懋助太湖營遊擊姚世熙撫標遊擊

胡上達援浙江南提標前營遊擊任九玉紹協都司
僉書朱士俊臣標守備段斌嘉興營守備薛受益湖
協千總池崗把總田彪臣標把總楊啓明呂仁義太
湖營把總李繼春江南提標把總陸貞并各營外委
千總趙秀蔣卿外委把總董茂邢一虎也其能奉臣
飭行協同招撫并供應催辦糧料夫船沿途安插得
宜者係廣信府知府高夢說照磨柴鳳屏典史程思
亨委署玉山縣知縣張偉烈署典史王瑩常山縣知
縣袁銷訓導莫家禎典史彭士成臣衙門筆帖式他
海巴達外委都司包秉彝段澄陳嘉績也除將在事

有功人員并繳到偽勅印劄付等項現在造冊揭送
吏兵二部查核外該臣看得偽揚烈將軍程鳳擁衆
數萬偽設二十餘營屯踞江西德興等處臣奉

旨會勦於康熙十五年十一月間已據程鳳有願來投誠
之稟是以撥兵駐境飭行將領相機招撫又於康熙
十六年正月間承准大將軍和碩康親王令諭據程
鳳啓報請就安插臣隨差員前往傳諭雖據口稱歸
順然遷延日久猶據德興堵守隘口後據報程鳳身
故伊妻王玉貞孛偽揚烈將軍印務臣慮復有變動
一面密飭駐防廣玉開常各汛將領任九玉等整頓

兵馬示以形勢并照會江西饒南總兵官高登科會同撫駁一面遣員齎檄分諭各營偽總兵等往返開誠曉示隨於康熙十六年三月十一日據寧偽揚烈將軍印務王玉貞差偽員赴臣軍前納款尚以追薦爲詞冀緩時日臣經面加慰諭多方開導限期前去卽於三月二十日王玉貞率領偽官兵至廣信姜歷村候示安插臣念全旅歸誠兵衆路遙經過地方恐致騷擾且沿途需給口糧爲數浩繁浙省投誠業已衆多再盡數來浙難以一時安插隨卽差員星往曉諭既經就撫應聽隨便安插如有土著官兵不願遠

離故鄉者卽便分發解散各令得所併行地方文武
官弁隨路安頓於四月十三日起臣軍前投誠呈繳
偽勅二道偽將軍銀印一顆偽銅關防六顆偽劄付
三百八十三張併偽旗牌令箭等項據王玉貞呈報
投誠僞官兵六萬七千三十二員名今查冊開僞官
兵數目除解散赴江西江南投誠外實在僞官三百
四十八員家口四百七十七名口僞兵三萬一千二
百四十三名內有沿途願辭回籍者已經隨便解散
其在常山等處辭回者俱經給照歸農其帶赴衢州
者現在逐一分發安插此皆仰賴

朝廷洪福大將軍和碩康親王德威致德興僞衆全師就
撫鄰境漸清所有齊臣諭示往返宣布克著勤勞之
外委都司金滿斗等奉臣指示機宜整率官兵勦撫
兼施并沿途防護約束之叅將蔣懋勛等協同招撫
并供應糧料安插得宜之廣信府知府高夢說等均
能盡心招撫綏靖地方功勤難泯至僞揚烈將軍程
鳳在日雖有投誠啓稟尚未撤兵開剗今身故之後
伊妻王玉貞接掌僞印乃能傾心效順同僞總兵楊
彪葉廷桂等各僞官率領大夥僞弁兵家口遠赴投
誠非尋常就撫者可比仰祈

勅部破格議敘以鼓向化除尚有椒巖洞等處未就撫賊
首陳崑山等現在調度官兵勦撫外臣謹密

題伏乞

皇上睿鑒施行

康熙十六年四月二十二日題奉

旨覽卿奏招撫到程鳳之妻王玉貞率衆投誠可嘉着議
奏該部知道

請蠲被兵地方錢糧第二疏

總督浙江等處地方軍務兼理糧餉兵部左侍郎兼都察院右副都御史從二品臣李之芳謹

題爲殘疆困苦已極難民號救堪憐謹遵

恩詔亟

請蠲賑大沛

皇仁以救百萬生靈事據浙江布政司布政使李士楨呈詳到臣除賑濟各府屬難民給過銀米細數咨俟另冊送部外該臣看得浙省衢溫處等府屬江山等各縣衛所因地方新復田土拋荒賦稅無從徵解經臣

欽遵

恩詔會疏

奏請蠲免部覆以恢復各縣衛所內有失陷日久亦有
失陷未久令臣等再行確查分別具題再議遵卽備
行布政司遵照去後茲據司府縣衛所各官歷敘失
陷月日援引閩省蠲免之例剴切詳籲前來臣覆查
前疏所

題皆係失陷最久地方如衢州之江山常山二縣西安
之下洲等處及衢州所龍游之南源等處金屬湯溪
之三源等處嚴屬遂安之附近開常都昌處屬松陽

雲和遂昌龍泉慶元景寧六縣溫屬永嘉瑞安平陽
泰順四縣皆於康熙十三年四五六七等月失陷至
康熙十五年八九十等月恢復如衢之開化溫之樂
清處之青田皆係旋復旋失至康熙十五年八月十
月始得全復以上失陷恢復日期俱及三年不爲不
久賊衆恣行殺掠更加逼餉苛徵百姓之死於鋒鏑
死於飢寒死於刑拷者不可勝計一村之中或向有
數百戶者今止存數十戶矣一家之中或向有數口
者今止存一二口矣其室廬則平爲賊寨其田畝則
掘爲濠溝今雖地方平定百姓皆鵠面鳩形僅存殘

喘日食不給牛種無資拋荒之土無力開墾若不亟
加撫綏難望漸臻生聚伏讀康熙十四年十二月十

四日

恩詔內開用兵地方民力重困蕩平之後各該督撫將應
行蠲免賑恤事宜卽行奏請普天之下莫不感頌

皇仁浙省難民當萬死一生之餘仰奉

綸音欣欣相告冀獲甦息查福建一省新舊錢糧已荷

天恩槩行蠲免浙閩聯界失陷歲月原屬相等且閩民惟
遭橫徵逼餉之苦而田廬尙完妻子尙在未若浙民
之處處戰場無地可避妻子離散田廬蕩然白骨盈

郊荆榛滿目慘澁如此其甚也伏惟

皇上視民如傷凡有水旱災荒輒蒙破格蠲賑今江山等
各邑殘黎奄奄待斃更非尋常災荒可比如康熙十
五年以前錢糧地方正爲賊踞民間尺布斗粟搜掠
無遺原已不可復問其康熙十六年錢糧見存戶口
寥寥無幾幸賴

天威救之水火之中必得大沛

皇恩庶以延其將絕之命若按籍徵輸則窮民已無產業
可戀勢必轉徙他鄉徒成紙上之逋欠其無濟於度
支究與蠲免無異迨至地方凋疲難以挽回必須仍

議獨恤不若保全於今日猶可漸次休養望有起色
臣等身任封疆因念軍需浩繁自當悉心籌畫浙省
用兵數載其未經失陷地方與失陷未久旋經恢復
地方如東陽永康等處但可設法徵輸無不殫力董
勸各年額賦未至大虧若此恢復最晚殘破最甚地
方小民救死不暇雖欲追呼敲扑實係無法可施伏
乞

皇上俯念浙民困苦已極

允臣前疏所請將江山等各縣衛所康熙十六年并以前
一應本折正雜錢糧照閩省事例槩

賜蠲免容臣等一面招徠開墾分別荒熟酌量

題明起徵保全百萬生靈將來得以力用供賦

國計民生均有裨益矣臣謹會同撫臣陳秉直合詞具
題事關錢疆困苦已極情形遵

詔備陳貼黃難盡伏乞

皇上全覽

勅部議覆施行

康熙十六年六月二十七日題奉

旨該部議奏

勦撫巨寇陳山疏

總督浙江等處地方軍務兼理糧餉兵部左侍郎兼
都察院右副都御史從二品臣李之芳謹密

題爲鄰省岐界巨寇勦撫肅清臣謹具

題仰祈

睿鑒事竊照江西巨寇僞總兵陳山卽陳崑山等屯踞椒
巖洞等處臣一面調度勦撫先經

題報在案惟是椒巖洞地方東通開化南通玉山山西通
德興山徑叢雜皆係羊腸鳥道騎不能行最稱要險
今逆賊陳山等盤踞此地堵拒隘口乘間四出劫掠

近地百姓不寧若非先勦後撫賊衆倚恃險阻未肯
革心歸命臣隨調度官兵令駐防常山臣標前營叅
將蔣懋勛太湖營遊擊姚世熙等援防玉山紹協都
司朱士俊等援防廣信江南提標遊擊任九玉等由
玉山進劄童家坊各路又令駐防開化撫標遊擊胡
上達江南提標遊擊崔天福等由開化進劄十七都
各路整頓兵馬密示機宜先將賊寨口子攻破奪取
險要迅速飛報再聽調度去後據叅將蔣懋勛等報
於康熙十六年四月十九日進攻洋塘金竹坑衮嶺
連捷三次陣斬偽副將叅遊都守千把等官并偽兵

一千餘名生擒逆賊董奇等六名得獲關防劊械等情臣查官兵連破賊寨直逼陳山老巢賊已破膽隨即申飭各將領在開化進兵者堵截東路在玉山進兵者堵截南路皆示以連營直前之勢一面令外委都司金滿貴隨征官陳捷駿等冒險深入陳山賊寨齋臣諭示宣布

皇仁往返開導始據陳山差僞員高起龍赴臣軍前稟稱蒙差官節次宣諭招撫當同叅遊都守等官俱已遵諭歸順共計官兵三千有餘候撥人夫口糧即便馳赴軍前等情臣即分飭叅將蔣懋勛遊擊胡上達姚

世熙守備薛受益等令其逐程接護所過地方無致騷擾又經臣發去銀兩交金滿貴等就近協同地方官採買糧米支給口糧均各分行去後於五月二十六七等日據偽總兵陳山偽參將陳祿等赴臣軍前投誠臣逐一宣布

皇恩各皆犒賞分別入伍歸農就便安插除將在事進勦獲捷人員及冒險入山往返宣諭招撫有功之外委都司金滿貴等整率官兵勦撫兼施并沿途防護約束之參將蔣懋勛等沿途接護催趲糧料之外委都司王來聘等供運糧料安插官兵之開化縣知縣崔

華等并投誠各官殺到偽劄關防數目現在造冊揭
送吏兵二部查核外該臣看得江西巨寇陳山等屯
踞椒巖洞等處巢穴險固路通開化玉山德興乘間
四出流毒人民倚恃山深徑狹堵拒隘口若非先勦
後撫地方無由寧靜臣飭行防援常山開化玉山廣
信各將領分道竝進密示機宜隨經叅將蔣懋勛遊
擊姚世熙任九玉等先取洋塘金竹坑袞嶺一帶賊
寨口子陣斬偽副叅遊都守千總等員并偽兵一千
餘名奪取險隘直逼陳山等老巢但椒巖洞等處素
稱奇險仄徑崎嶇馬不能行非旦夕可破隔省饋運

糧料艱難恐致勞師糜餉今乘賊寇破膽可以因機
招撫一面申飭將領於開化玉山兩路進口之處連
營整旅扼其衝要一面遣外委都司金滿貴等齎諭
入山往返開導當據僞總兵陳山統僞參遊等率衆
自開化一路至衢投誠僞參將陳祿統僞都守等率
衆自玉山一路赴衢投誠呈繳僞劄關防通計僞官
一百餘員僞兵解散歸農及現在收伍安插者共二
千一百餘名所有在事人員進剿獲捷及相機招撫
接應糧料均有勤勞合將勦撫情形臣謹密疏

題報伏乞

皇上睿鑒施行

康熙十六年七月二十六日題奉

旨覽卿奏遣發官兵於洋塘等處地方勦殺賊寇陣斬偽副將等又招撫偽總兵陳山等具見調度有方將士奮勇可嘉在事有功人員着議敘具奏兵部知道

請卹殉難將弁疏

總督浙江等處地方軍務兼理糧餉兵部左侍郎兼
都察院右副都御史從二品臣李之芳謹

題爲將弁殉難可憫仰祈

特恩優卹以慰忠魂事據浙江布政司布政使李士楨呈
詳看得樂清副將蘇木代當賊踪逼臨堅守孤城抗
志不屈遂遭賊害并戮其家丁陳雙丁等五人其餘
眷屬盡被分拆一腔忠勇千古不磨又處協把總左
朝極駐防景寧縣當逆寇侵犯之時罵賊鏖戰捐軀
報

國與兵丁崔應龍等四名殺賊陣亡似此勁節擬合一併詳請具

題請卹以慰忠魂等因到臣該臣看得原任樂清營副將蘇木代當逆踪逼臨堅守孤城抗志不屈遂爲賊殺家口五人俱遭慘害其餘眷屬盡被分拆今據伊子蘇萬城等籲控臣批據寧紹道查覆又原任處協把總左朝極當逆寇蜂擁侵犯該弁罵賊鏖戰捐軀報

國與兵丁崔應龍等四名殺賊陣亡據景寧縣具文通詳臣俱批行布政司確議茲據該司詳覆前來臣查

副將蘇木代把總左朝極殉身報

國忠貞可憫仰祈

皇上勅部議卹以慰忠魂至蘇木代所遺家口臣欽遵

上諭凡殉難文武大小官員骸骨妻子俱准動正項錢糧
資送歸里現在量給路費酌撥夫船令其扶柩回籍其
左朝極下陣亡兵丁現行布政司查明馬步歸入彙
報陣亡兵丁冊內外合併

題明臣謹會同撫臣陳秉直提督臣石調聲合詞具
題伏乞

勅部議覆施行

康熙十六年八月二十一日題奉

旨據奏蘇木代等抗賊殉節忠貞可憫作何恩卹着從優
議奏該部知道

加秩謝 恩疏

總督浙江等處地方軍務兼理糧餉兵部尚書兼都察院右副都御史正一品臣李之芳謹

奏爲恭謝

天恩事臣於康熙十六年九月初四日准吏部咨爲欽奉上諭事文選清吏司案呈奉本部送吏科抄出該本部覆兵部題前事等因康熙十六年七月十九日奉

行李之芳着加兵部尚書仍兼都察院右副都御史授爲正一品照舊管事欽此欽遵相應移咨并粘抄原疏到臣准此臣恭設香案望

闕叩頭謝

恩訖竊惟封疆有事殫心竭力乃臣子之常分况臣服官
以來叨蒙

皇上知遇迥逾常格自宜勉効涓埃以報

高厚深恩惟愧疎庸未諳軍旅驟當艱鉅之任常以隕越
爲憂仰藉

皇上天威

廟謨制勝三年戰守所向克捷賊勢旣蹙一朝蕩平亦賴
文武大小各官咸盡忠勤地方克平獲免罪戾己爲
萬幸何敢言功茲蒙

皇恩議敘

賜加崇秩撫躬自愧實屬踰分伏念浙省內地雖稱平定而滄島餘氛尚在不時飄忽新復地方殘黎困苦元氣未復投誠之衆實繁有徒鷹眼未化臣忝膺重任夙夜焦思惟恐有負職守

寵榮愈厚報稱愈難臣雖捐糜頂踵不足仰酬天恩於萬一臣無任感激惶悚之至謹具疏恭

謝伏乞

皇上睿鑒施行

康熙十六年九月十三日奏奉

旨該部知道

...

三

調回江南援浙官兵疏

總督浙江等處地方軍務兼理糧餉兵部尚書兼都察院右副都御史正一品臣李之芳謹密

題爲酌撤援浙官兵回汛以節省糧餉事竊照康熙十三年間閩省變亂侵犯浙疆斯時勦禦兵單經前任鎮浙將軍臣圖喇移咨江南督臣阿席熙調發江南提標狼山鎮標共兵一千名各遠遊擊一員統領赴浙援勦又准兵部咨移調發京口隨旗綠旗兵丁及兩路鎮標綠旗兵丁三千名并江南提標綠旗兵丁二千名令原副都統今補福建提督臣段應舉統領

來浙與總理糧餉侍郎臣達都等會商策應所遺兵
缺令募補足額事平之日將補兵仍額外留營等因
奉

旨欽遵在案自康熙十五年八月間大兵進閩福建提督
臣段應舉統領本標官兵隨征將京松五營官兵留
浙防勦移咨聽臣統轄臣隨移商總理糧餉侍郎臣
達都接准咨稱浙省官兵多隨大兵進勦尚未回浙
現今寧台溫等處海疆多事需兵防禦京松各營官
兵仍應存浙等因在案今臣標五營併浙省各營官
兵有隨奉命大將軍和碩康親王入閩及現在江右

遵

旨勅撫各寇者俱未回汛寧台溫一帶游氛未息臣於密報海逆情形等事疏內

題報在案近復毒據瞭報賊船往來洋面或停泊外港
聯踪飄忽狡謀叵測捍禦正殷浙省投誠不止數萬
隨地安插必資重兵彈壓庶使鷹眼漸化但當此軍
需浩繁凡可節省錢糧裨益

國計者宜早爲籌畫雖當海疆多事但地方汛守當責
成本省經制官兵盡心防禦臣屢經中飭沿海將領
嚴謹固圉俟援勦閩江官兵回汛酌有汛廣兵單之

處再爲分撥協防所有京松各營官兵似可調回江
南恒兵省餉隨經啓請奉命大將軍和碩康親王奉
諭京口營遊擊張宏弼官兵一千員名現畱防浦城
等處要汛未便撤調其餘在浙京松各營官兵應行
調回可也等因併移准將軍臣馬哈達咨覆前來該
臣看得江南京口松江各營官兵調援浙省歷著戰
功自上年大將軍和碩康親王統師進閩將此各營
官兵分佈浙江沿海與閩江聯界各路防勦今浙省
地方雖海氛未息賊踪飄忽閩江餘寇勦撫未竣投
誠衆多始經革而凡係要地尚須彈壓故邊疆將領

舟以汎廣兵單爲請但今日地方事勢投之往日業已不同且各兵兼支行坐糧餉所費浩繁當此需用錢糧之際臣敢不悉心籌畫力圖節省惟今調援閩江官兵尚未回汎援勦鎮官兵又經奉裁目前浙省現在之兵佈置汎守雖未能周密臣自當多方調度整飭嚴防以固疆圉若撤回前項客兵歲省金錢數萬亦可稍裨

國用除遊擊張宏彌一營官兵奉康親王諭仍畱浦城外其餘各營官兵五千餘員名應

請調回原營臣謹密疏具

題伏乞

勅部議覆施行

康熙十六年十月初三日題奉

旨兵部確議具奏

招撫鄰省渠寇疏

總督浙江等處地方軍務兼理糧餉兵部尚書兼都察院右副都御史正一品臣李之芳謹密

題爲鄰省渠寇歸誠岐界餘氛漸盡臣謹具

題仰祈

睿鑒事竊照江西岐界餘孽自經臣

題請會剿以來凡應勦應撫事宜臣皆多方調度總期靖寇安民務俾地方早得寧靜案將屢次勦撫情形具疏

題報在案惟尚有偽總兵林爾瞻等擁衆數萬屯踞江

西鉛山縣石壠地方倚恃萬山叢雜道路崎嶇隘口險峻據爲巢穴兼之壠內聚集屯民糧草有資又通連廣信上饒永豐一帶及福建分水關光澤縣等處出沒剽掠負固日久案經奉命大將軍和碩康親王差投誠總兵柯俊齋諭招撫據稱願赴臣軍前投誠虛詞支飾而拒險肆掠如故據調防鉛山臣標守備龔堂等飛報近日林爾瞻等復加造木城修築臺寨挑濠造砲防禦甚嚴更乘間四出劫掠近地百姓不獲安寧臣因林爾瞻等雖稱願來投誠但狡情難測非震以兵威未肯革心向化臣隨飭令江南提標遊

擊任九玉等臣標守備段斌等由廣信一路進兵臣
標守備龔堂江南提標守備路雲昇等由鉛山一路
進兵臣標叅將蔣懋勛饒承德等由常山一路進兵
密授各將領方畧令將賊寨四面口子盡行堵截斷
其趨道再聽調度去後嗣又奉大將軍康親王令諭
內開逆賊林爾瞻等聚集亡命不啻數萬崇山峻嶺
隘口繁多飛調官兵於鉛山湖坊等處嚴守要口訂
期會剿庶山寇可靖而三省界地可寧仍卽一面轉
咨江西總督速令官兵前赴鉛山湖坊等處嚴守隘
口訂期夾剿等因到臣承此臣一面移咨江西總督

董衛國一面飭行官兵訂期夾勦但念石隴處萬山之中進徑最險官兵隔省齋難搜勦恐致曠日持久勞師糜餉臣隨令外委都司王國賢趙宗文苟輔達劉永捷段澄包秉彝陳嘉績外委守備沈榮祖齋臣諭示入山臣標叅將蔣懋助守備龔堂段斌江南提標遊擊任九玉守備路雲昇輕騎徑進冒險入寨宣布

皇恩開導禍福林爾瞻等尚游移其詞託以詔曲屯民家口衆多未能一時出山臣據報文復飭外委都司王國賢等叅將蔣懋助等深入老巢委曲招諭始據林

爾瞻差僞員李世榮等齎稟同王國賢等前赴軍前
納款臣當傳僞員李世榮等面加獎賞再令王國賢
等同委員李世榮等前往撫慰又檄令叅將蔣懋勛
等防護約束經過地方毋令騷擾又檄令常山縣知
縣袁鎔等供運糧料遣備船隻去後隨據林爾瞻率
僞副總兵林啓侯僞兵備道許鵬僞知府蕭岸僞同
知張雄許贊僞通判趙浙玉余致遠以及僞副叅遊
都守千等各僞員於康熙十六年九月初一日出山
因隨帶官兵家口衆多一路安頓至初八日到臣軍
前呈繳僞印劄投誠據林爾瞻稟稱轄下僞官兵共

計有四萬五千餘員名內各官兵原籍多有江西浙
江福建江南等處不等茲奉招撫俱皆剃髮一面遵
諭隨便解散惟是兵衆甚多除現到軍前之外其餘
官兵作何安插請示前來臣卽頒賞銀牌袍帽等項
復令王國賢等同林爾瞻前去會同廣信府地方各
官多方安頓願回原籍者聽其隨便解散願就近居
住者卽行分發安插願効用人伍者仍准効用收伍
毋致失所去後今據廣信府知府高夢說報稱奉令
遵卽關委同知李渾通判楊照前往鉛山同知縣曾
光龍并委署照磨柴鳳扉上饒縣縣丞龔戴銓興安

縣典史郭世鞏赴同料理分發安插投誠官兵今准同知季渾關覆查林爾瞻等偽營官兵甚衆隨會同叅將蔣懋勛遊擊任九玉外委都司王國賢趙宗文等齊赴虎頭門石壠一帶地方將偽官兵各行分發解散其往浙効用入伍官兵會同督糧通判楊照捐措銀兩令鉛山縣知縣曾光龍上饒縣縣丞龔戴銓與安縣典史郭世鞏分途催覓人夫船隻起送赴衢其願回籍偽官兵及家口人等卽令各歸原籍願就近屯種者卽各給印票聽其屯種仍行各地方官管轄加意撫綏俾其得所至於被陷偽營難民男婦子

女通示曉諭令親屬赴認逐一量給鹽米當堂認領
等因關移到府界府查投誠官兵衆多自鉛山起發
路由上饒玉山二縣經過預行二縣僱覓人夫接應
上饒縣知縣馬之駿委署玉山縣知縣張偉烈捐資
僱夫起發無誤相應一併彙請議敘今招撫事竣合
將分發安插數目造冊呈送等情前來據此所有冒
險入山招撫有功之外委都司王國賢等叅將蔣懋
助等領兵接應協同招撫之叅將饒承德等安插得
宜之廣信府知府高夢說等供運糧餉僱趙船隻之
常山縣知縣袁鎬等并偽員官兵數目印劄等項見

在另冊揭送吏兵二部查核外該臣看得江西渠逆
僞總兵林爾瞻等擁衆數萬盤踞石壠地方倚恃叢
山溪險壠內聚集屯民足供資糧外則四路旁通易
於出沒負固日久抗不歸命肆出焚掠流毒地方先
經奉命大將軍和碩康親王差官齎諭招撫雖據林
爾瞻等稱願赴臣軍前投誠但遷延數月並未剃髮
出山拒守劫掠如故臣隨調集官兵四面堵截又奉
大將軍康親王有會勦之令臣一面移咨江西督臣
董衛國訂期會勦但念溪山峻險官兵隔省齎糧進
攻恐非旦夕可平隨令外委都司王國賢等齎臣諭

示臣標叅將蔣懋勛等輕騎徑進各冒險深入老巢
再三往返委曲開導始據偽總兵林爾瞻偽副總兵
林啓侯統率偽官兵赴臣軍前呈繳偽牌劄關防傾
心向化除隨便解散偽官兵不開外實計招撫偽官
一百餘員偽兵二萬三千八百餘名願効用入伍者
卽分發在浙標營願就近歸農者俱令廣信府知府
高夢說等逐一安插所有在事人員咸能遵臣調度
冒險入山領兵接應協同招撫供應糧料安插得宜
查石壠距浙界三百餘里前江省官兵到汎尚少浙
省官兵堵禦賊寇保護生民間警星馳多方偵備已

非一日其零星勦獲臣皆據報獎賞不另請敘今會
兵四進率能招撫來歸不避艱險而投誠之衆其及
數萬安插供應各地方官備極勤勞其功均難泯沒
伏乞

勅部一體議敘以鼓任事之心至江西饒廣一帶向因山
寇盤踞道路阻絕臣以浙江江西懸境若鄰界餘氛
未淨則浙地伏莽堪虞是以

題明會勦惟念尺土皆

朝廷之封疆一民皆

朝廷之赤子不致復分畛域凡可就近勦撫無不悉力而

行今廣信以及饒州各屬次第就平尚有未靖餘孽
江西官兵見在搜勦各屬地方皆有本省經制官兵
到汛前請發赴援之江南各營官兵已經臣另疏請
撤以省糧餉浙省官兵亦當還浙彈壓衝要地方并
資沿海應援臣見在酌量陸續調回外合將招撫渠
寇情形臣謹密疏

題報伏乞

皇上睿鑒施行

康熙十六年十二月初八日題奉

旨覽卿奏招撫到鄰省偽官一百餘員兵丁二萬餘名可

嘉着議敘具奏該部知道

請蠲被兵地方錢糧第三疏

總督浙江等處地方軍務兼理糧餉兵部尚書兼都察院右副都御史正一品臣李之芳謹

題爲錢疆困苦已極難民流救堪憐謹遵

恩詔亟

請蠲賑大沛

呈仁以救百萬生靈事據浙江布政司布政使李士楨呈
詳看得浙省慘遭閩變被陷郡邑直至康熙十五年
八九十月陸續恢復皆緣界近閩疆自康熙十三年
一罹變亂先遭淪陷遂致三載之久如溫州之五縣

與處州續復之七縣市廛拆毀房屋蕩傾貲財竭於
橫徵錙銖盡於酷斂夫役繫而百死一生追呼急而
十室九空此兩府地方無不被陷之鄉都百姓苦累
皆係至重而無輕也至衢之江常開與西安縣之鄉
都下洲大溝百靈等處龍游縣之南源各都遂安縣
之五六等都湯溪縣之三源等都亦係康熙十三年
被賊屯踞直至康熙十五年八九月方得恢復其遠
近各都田疇荒廢廬舍灰燼或一都之內丁口鮮存
或一里之中爨煙全斷山林日堆白骨風雨夜泣青
燐又溫州衙屯田坐落平陽各都衢州所屯田坐落

西安各都失陷之後丁佃逃亡雖招徠一二子遺棲身無處牛種全無夫賦稅必問諸人土今人戶流離田園荒廢職斯土者安能起白骨而追呼向荒野而徵此此在前所開地方皆屬被陷苦累實係至重而無輕也當此

國用浩繁之日本司非不欲擇其受累之輕者而亟行催徵其柰溫處各屬與江常關等各縣溫衢衛所并西龍湯遂等縣都畝原屬陷累最久招集遺黎皆係鋒鏑餘生湯火殘命家家絕粒戶戶啼飢自宜援闕省全免之例亟予

題詞且康熙十五年捧接

恩詔內開用兵地方民力重困蕩平之後各該督撫將應行蠲免賑恤事宜卽行奏請煌煌

天語炳若日星待澤綏黎朝夕引領合亟詳請本部院俯將原題衢溫等府城鄉全陷之江常開永樂瑞平泰青松遂雲龍慶景等十五縣并西龍遂湯之續復各都溫衢衛所失陷困苦情由亟請具

題務期允將康熙十六年暨十五年從前一應新舊起存地丁雜稅漕屯糧米槩予豁免廣佈

皇恩則不特見在戡黎獲甦遺命卽未集流亡亦可望其

漸次來歸新舊荒田亦可冀其遂漸墾闢其於

國計民生大有裨益矣等因到臣該臣看得康熙十五年正月十二日欽奉

恩詔川兵地方民力重困蕩平之後各該督撫將應行蠲免賑恤事宜卽行奏請臣等恭誦

綸音伏念百姓雖遭兵革異常之害荷蒙

皇上如天之仁湯火殘黎咸有更生之慶其時浙屬溫處等地方尚未恢復而

天聲遠播民間忻幸永望者久矣及康熙十五年八月以後郡縣相繼恢復城郭空虛人民無幾

國家數十年休養生息一旦蹂躪至此慘傷萬狀不忍
見聞臣等思平賊之後事之重大而最急者惟有仰
遵

恩詔亟

請蠲免以救垂死之民是以會疏具

題部議以各地方失陷恢復久近不同駁行確查臣隨
將江山等各縣衛所俱係康熙十三年四五六七等
月失陷康熙十五年八九十等月恢復備開月日覆
題今部議以各縣衛所城池雖陷亦有鄉都未經失陷
者且苦累輕重不同仍行分別具題再議遵行布政

司遵照去後今據詳覆前來臣查溫屬失陷而賊兵犯及台州處屬失陷而賊兵犯及金華江山常山失陷而賊兵犯及西安龍游開化失陷而賊兵犯及遂安止有城池僅存而鄉都已陷如西安龍游遂安湯溪各縣者若城池既陷其鄉都竝無一隅倖免子女皆爲賊之婢僕牛種皆爲賊之資糧房屋皆爲賊之寨柵田畝皆爲賊之營壘濠溝殺戮焚掠無不備極何從得有未經失陷之鄉都至云苦累輕重不同此在尋常水旱災傷或有差等從來兵戈所至玉石同盡况其盤踞至於三年之久荼毒已遍搜括無遺嗟

此窮黎死於鋒刃則同死於飢寒則同死於橫徵拷
餉則同室廬焚拆田畝拋荒則同夫失其妻父失其
子則同真乃無人不苦無地不苦無時不苦但見其
重未見其輕非臣之不行分別實無可分別也福建
一省錢糧已蒙

天恩盡行蠲免浙閩連疆同遭寇亂而浙民在征戰之場
其受害十倍於閩民向之生聚不存一二僅有孤老
鰥夫傷殘餓殍其餘則皆投誠安插之衆也賦從田
出田既荒矣有人尚難徵糧况并無人可問若稍有
可徵之理可徵之勢地方各官豈無籌

國之心惟此子遺殘喘卽欲極力追呼徒驅而致於死
亡終於

國賦無益臣等蒙

皇上簡畀重任正畀以撫綏百姓之責今白骨荒郊鶉衣
鵠面之狀臣親見之啼飢號寒哭妻哀子之聲臣親
聞之非不念需餉之際而明知百姓之萬不能完安
敢不迫切籲陳以望

天恩之拯救竊惟仰遵

恩詔以昭大信於天下近援閩省之例以示

覆載一體之仁俾此難後殘黎將來力田供稅尚有可期

國計民瘼原非二事伏乞

皇上睿鑒特沛

恩音允臣前疏所請將衢屬江山常山開化三縣溫屬永
嘉樂清瑞安平陽泰順五縣并溫州衢處屬青田松
陽遂昌雲和龍泉慶元景寧七縣衢州所并西安縣
之下洲百靈等鄉龍游縣之南源各都遂安縣之五
六等都湯溪縣之三源等都康熙十六年并以前一
應本折錢糧照閩省事例槩

賜蠲免保全萬死一生之餘民庶得漸次招徠復業開墾

臣謹會同撫臣陳秉直合詞具

題緣係殘疆困苦已極遵

詔備陳貼黃難盡伏乞

皇上全覽

勅部議覆施行

康熙十六年十二月初八日題奉

旨該部議奏

李文襄公奏疏卷七終